



ज्वजलपा वाःपौ

JWOJALAPA WEEKLY

दैं ६ ल्याः ४७ (पूर्णडक ९९) ने. सं. ११३६ तछलाश्व अस्तमि आइतवाः २०७३ जेठ ३० गते आइतवार (Jun- 12, 2016)

मू द १- पृष्ठ ६

नेवाः नापं उत्पीडित समुदायया अधिकार गुगु कथं वइ ?

जारी याःगु न्ह्यु संविधान धइगु तसकं बांलाःगु अले आः मदुगु फुक्क अधिकार कायेगु कथंया संविधान संशोधन यायेफइ नापं संविधान धइगु परिवर्तनशील खः धकाः नेतातयसं धया च्वनादीगु दु । नेतातयसं संविधान जनताया चाहना कथं गुगु नं इलय् संशोधन याये फइगु अले सार्वभौमिकता, भौगोलिक अखण्डता, स्वाधिनता व जनताय निहित सार्वभौमसत्ताया प्रतिकूल जुइगु कथंया बाहेक मेगु फुक्क कथंया धारात संशोधन यायेफइ धकाः धयादीगु दु । थुगु ल्याखं प्रमुख दलया नेतातयसं थःथःपिनिगु लेंपु चाःगुलिं तसकं बांलाःगु व गुगु नं इलय् जनताया चाहना कथं संविधान संशोधन यायेफइगु कथंया व्यवस्था दु धकाः न्ह्यथसं नेपाःया आदिवासी जनजाति, मेघसी, दलितनिसं उत्पीडित समुदायया हक अधिकार नं लिपा लिपा गुलि माः उलि तया वनेफइगु अवस्था दुगु ब्याख्या याना वयाच्वनादीगु दु । संविधानया संविधान संशोधनया ल्याखं स्वल धाःसा आदिवासी जनजातिया पहिचाननिसं समानुपातिक समावेशी प्रतिनिधित्वनिसं हरेक ख्यलय् समानताया मागयात संविधान संशोधनया माध्यमं पूर्वक फइगु अवस्था ला दु तर संविधान संशोधन गुगु कथं जुइगु अले संशोधनया प्रक्रिया छु धकाः स्वल धाःसा हीमी चायेमालीगु अवस्था दु ।

संविधानय् खस आर्य धकाः क्षेत्री, ब्रम्हु, ठकुरी, दशनामी व सन्यासीयात संवैधानिक जाती याये धुंकूगु अवस्था दुसा आः नेवा, तामाङ, थारु लगायतया जातीयात नं संवैधानिक जाती यायेगु खःसा संविधान संशोधन यायेमाः अले संविधान संशोधन धाःसा संघीय संसदया निगू हे सदनया दुई तिहाई बहुमतं पारित यायेमाःगु प्रावधान दु । उलि जक मखु प्रदेशया संसदय् तकं सरोकारया विषयात कया प्रदेशं तकं बहुमतं पारित याना हयेमाःगु अवस्था दुसा यदि प्रदेशय् बहुमत मन्त धाःसा संशोधनया नितिं हःगु विधयेक अथे हे निश्चय जुइगु प्रावधान दयेकातःगु दु । आः जारी जूगु

स्वराज महर्जन

समाचार विश्लेषण

संविधान स्वल धाःसा न्ह्यगू प्रदेशय् खुगू प्रदेश ला खस आर्यया हे वर्चस्व जुइगु कथंया व्यवस्था याःगु दु । छगू प्रदेशय् जक मधेसीतयगु वर्चस्व जुइ । खुगू प्रदेश मध्ये नेवाःतयगु आदिभूमि स्वनिगः लानाच्वंगु ३ नम्बरया प्रदेश स्वल धाःसा नेवाःतयगु जनसंख्याया प्रतिशत १६ दशमलव ९१५ प्रतिशत जूगु दु । तर खस आर्य ३७ प्रतिशत अले तामाङत २० प्रतिशत दु । थुगु ल्याखं स्वल धाःसा नेवाः व तामाङत छथाय् तल धाःसां नं खय् ब्रम्हुत हे यक्व दइगु कथंया सिमाडकन याःगु दु । अथे हे १ नम्बर प्रदेशय् दक्ले अप्ठः खस आर्यत २८ प्रतिशत अले तराईया आदिवासीत १२ प्रतिशत, २ नम्बर प्रदेशय् मधेसीत ५२ प्रतिशत अले मधेसी दलत १६ प्रतिशत, ४ नम्बर प्रदेशय् खस आर्य ४२ प्रतिशत अले मगःत १७ प्रतिशत, ५ नम्बर प्रदेशय् खस आर्यत ३० प्रतिशत मगःत १६ प्रतिशत, ६ नम्बर प्रदेशय् खस आर्यत ६२ प्रतिशत पहाडे दलितत २३ प्रतिशत अले ७ नम्बर प्रदेशय् खस आर्यत ६० प्रतिशत थारुत १७ प्रतिशत जनसंख्या दु ।

न्ह्यगू प्रदेशया थासय् भिगू प्रदेश दयेकूगु जूसा दक्ले अप्ठः जनसंख्या जुइगु ल्याखं निगू जाती अथवा समुदायया धलः स्वयेगु खःसा १ नम्बर लिम्बुवान प्रदेशय् लिम्बुत २७ प्रतिशत अले खस आर्यत नं २७ प्रतिशत हे जनसंख्या दइगु खः । अथे हे २ नम्बर किराती प्रदेशय् राईत ३५ प्रतिशत अले खस आर्यत २७ प्रतिशत, ३ नम्बर पूर्वी मधेसय् मधेसीत ४७ प्रतिशत अले मधेसी दलित १५ प्रतिशत, ४ नम्बर ताम्सालिङ प्रदेशय् तामाङत ३५ प्रतिशत खस आर्यत ३० प्रतिशत, ५ नम्बर नेवाः प्रदेशय् खस आर्यत ३७ प्रतिशत अले नेवाःत ३६ प्रतिशत, ६ नम्बर नारायणी प्रदेशय् खस

आर्यत ४५ प्रतिशत मगःत ११ प्रतिशत, ७ नम्बर तमुवानय् खस आर्यत ३३ प्रतिशत अले गुरुङत ३२ प्रतिशत, ८ नम्बरया मगरात प्रदेशय् मगःत ३५ प्रतिशत अले खस आर्यत नं ३५ प्रतिशत, ९ नम्बर पश्चिम तराई प्रदेशय् थारुत २७ प्रतिशत अले खस आर्यत २५ प्रतिशत नापं १० नम्बर खप्तड प्रदेशय् खस आर्यत ६० प्रतिशत अले दलितत १९ प्रतिशत दइगु खः ।

भिगू प्रदेश यात धाःसा खस आर्यतयगु वर्चस्व फुक्क धाइथें प्रदेशय् कायम मजुइगु अले आदिवासी जनजाति नापं मधेसीतयगु वर्चस्व दइगु तायेका हे इमिसं न्ह्यगू जक प्रदेश दयेकूगु खः । न्ह्यगू प्रदेशया ल्याखं स्वल धाःसा छगू प्रदेश बाहेक फुक्क हे प्रदेशय् खस आर्यतयगु वर्चस्व कायम जूगु दु ।

उकिं संविधान संशोधन यायेमाल धाःसा खस आर्यतयसं चाहना याःगु कथं जक प्रदेश सिफारिस यायेफइगु अवस्था दु । आदिवासी जनजाति, मधेसी, दलितनिसं उत्पीडित समुदायया माग कथं संशोधनया सवालयात कया प्रदेश हे पारित याना यंकेफइगु अवस्था मदु । अले प्रदेशं यंकल धाःसां हाकनं संघीय सदनं दुई तिहाई बहुमतं पारित यायेमाःगु अवस्थाय् आः संविधान कार्यान्वयन याना प्रदेशत गठन जुइ धुंकाः नेवाः नापं आदिवासी जनजाति, मधेसी, दलित नापं उत्पीडित समुदायया माग कथं संविधान संशोधन यायेफइ धइगु छगू कथंया म्हगस जक जुइगु अवस्था दु । उकिं यदि धातयें जारी जूगु संविधानय् थःपिनिगु अधिकार मदु धइगु खःसा प्रदेशत निर्माण जुइ न्ह्यः हे संघर्षया माध्यमं वर्तमान संसदपाखें संशोधन यायेत गुलि अपुइ कन्हय् वना उलि जुइगु अवस्था मदु ।

थ्व खँय् नेवाः पहिचान पक्षधरनिसं मातृभाषा व आदिवासीया अधिकारया सः थ्वयेकाच्वपिं व थीथी राजनीतिक पार्टीइ दुपिं नेवाः नापं आदिवासी जनजाति समुदायया कार्यकर्ता व नेतातयसं बिचाः यायेमाःगु ई वःगु दु ।

छ्याकःल्वहं पर्यटकीय थाय्या रुपय् दयेकीगु, वीर किपूमि मिसाया भूवाता तइगु

ज्वजलपा वाःपौ /

बंगु पुष २७ गतेया दिनय् नेवाः प्रदेशय् आदिवासी जनजाति जागरण अभियानपाखें किपूया छ्याकःल्व तय् वया मंकाः कथं थुकलं बिइगु ज्याजुगु खः । अथे छ्याकःल्वहतय् थुकलं बिइगु ज्या किपूमितय्सं न्हापानिसं याना वयाच्वंगु खः ।

पृथ्वी नारायण शाह नं किपुलिङ अन्यायपूर्वक त्याकूगु अर्थात त्याके धुंकाः नं मचात बाहेक सकलसिगु न्हाय् तकं ध्यना बिउगु इतिहास दुसा अथे अन्यायपूर्वक त्याकूगुलिं किपूमितय्सं तसकं बांमलाःगु ल्वहं छ्याकःल्वहं थें पृथ्वी नारायण शाह धकाः थुकलं बिइगु याना वयाच्वंगु खः । उकियात हे लुमंकाः नेवाः नापं आदिवासी जनजातितय्सं मंकाः कथं थुकलं बिइगु ज्या याःगु खः ।

किपूया इतिहास नाप स्वानाच्वंगु छ्याकःल्वहंयात पर्यटकीय लागाया रुपय् विकास याये फइगु तायेक



पृथ्वी नारायण शाहया नामय् जनजातितय्सं छ्याकःल्वतय् थुकलं बियाच्वंगु,

स्थानीय सन स्टार क्लबपाखें आः छ्याकःल्वहंयात बांलाक्क खने दयेकेगु नापं उगु लागायात आकर्षणया केन्द्र यायेगु आजु तया मर्मत यायेगु ज्या सुरु याःगु दु ।

छ्याकःल्वहंयात बांलाक्क खने दयेकेगु नितिं अथे मर्मत यायेगु ज्या

यानाच्वंगु खः । अथे हे छ्याकःल्वहंया च्वसं हे किपूया वीर मिसाया प्रतिक कथं क्रोध मुद्राय युद्ध ल्वानाच्वंम्हेसिया भूवाता तयेगु बारे नं सहलह ब्याकेगु ज्या जुयाच्वंगु दु ।

अथे हे गुलि गुलिसिनं कीर्तिलक्ष्मीया हे भूवाता तयेमाः धयाच्वंगु दुसा गुलि



छ्याकःल्वहंयात आकर्षणया केन्द्र दयेकेगु नितिं मर्मतया ज्या जुयाच्वंगु लू

गुलिसिनं कीर्तिलक्ष्मीया बारे इतिहासय् मदुगुलिं आः कीर्तिलक्ष्मी मध्यासे किपूमि छम्ह मिसाया प्रतिक कथं भूवाता तयेमाः धकाः नं खँ वयाच्वंगु दु ।

अबले किपूमि मिसापिं तकं युद्धय् वीरतापूर्वक ल्वागु इतिहास दुगुलिं आः किपूया मिसाया भूवाता तयेगु बारे

सहलह ब्याकाच्वंगु खः । छ्याकःल्वहं व किपूया वीर मिसाया भूवाता तयेगु ज्या जुल धाःसा उगु लागा पर्यटकया नितिं आकर्षणया केन्द्र जुइगु अवस्था दु धकाः सन स्टार क्लबया छम्ह दुजलं जानकारी बियादीगु दु ।



ज्वजलपा वाश्यो

सल्लाहकार
श्रीकृष्ण महर्जन
प्रकाशक:

नजरराम महर्जन
सम्पादक

श्रीकृष्ण तण्डुकार
ले-आउट:

ज्वजलपा डेस्कटप
संवाददाता

भरत महर्जन, निरजमान सिंह
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४९४०९०७७

ई-मेल : kirtipur_sandesh@live.com

सम्पादकिय

न्हूगु शक्ति व अधिकार

डा. बाबुराम भट्टराई नं थःगु न्हूगु शक्तियात औपचारिक रुपं घोषणा यानादीगु दु । एकीकृत माओवादी पार्टी त्वःता: वये धुंका: विकास व समृद्धिया नारा ज्वना न्ह्या: वनादीमह डा. भट्टराई नं न्हूगु शक्ति घोषणा यानादीगु धइगु मूल रुपं विकास निर्माणयात लक्षित याना न्ह्या: वनेगु नितिं हे ख: धका: धायेफइगु अवस्था दु ।

अले डा. भट्टराई नं उत्पीडित समुदायया मागप्रति थःगु समर्थन दु धका: अभिव्यक्ति विइगु नाप नापं संघीय गठबन्धनया न्ह्यानाच्वंगु रिले अनसनयात तकं समर्थन याना न्वंवानादीगु दु । पहिचान, समानुपातिक समावेशी पक्षधरपिनिगु नितिं डा. भट्टराई नं थःगु ऐक्यबद्धता प्वंकूगुलिं लसता क्यंगु दु । तर डा. भट्टराईया लाइन स्वल धा:सा उत्पीडित समुदायया हक अधिकारया नितिं संघर्ष यायेगु धयाच्वंगु मदु बरु जारी जूगु संविधानयात हे कार्यन्वयन याना चुनावय् त्याका वनेगु अले थःपिन्सं अज्वःगु अधिकार विइगु जुइ धयाच्वंगु दु । उकिया अर्थ आ: न्हूगु शक्ति धइगु चुनावयात लक्षित याना न्ह्या: वनेगु तयारी या:गु खने दु ।

अथे चुनावपाखें वन धा:सा अधिकार अ:पुक वइला कि आ: हे संघर्षया माध्यमपाखें वइ धइगु खँय् धा:सा पहिचान नापं समानुपातिक समावेशीया पक्षय् दुपिं न्हूगु शक्तिया नेता व कार्यकर्तातय्सं आ: हे बिचा: यायेमा:गु अवस्था दु ।

साहित्य/चिनाखँ

हाईकू शौरभ शाक्यया

शौरभ शाक्य

खवप

८९. सुतिल:हाया
चुक म्हछिं म्वःल्लुल
नाडुगा व्वया म्ह ।
९०. भंगया सुरुं
कसि स्वां लसय् दुब्यू
निथुक मन ।
९१. न्यातपौया गं
फसं तानातुनुं था
भैलद्य:मस्त ।

९२ रंग, बेरंग
कुरंग, सास्ति नल
हाकु रंग जि ।
९३. ल:प्वचा होली
ल:जुयावपिं मनु
अवस्था देश ।
९४ येचाया रंग
म्हछिं येचालं लुना
जीवन, पुसा ।

वार्निड !!



रोशन श्रेष्ठ

अमेरिका

वंगु वा:या ल्यंगु

(३) नेवा:तयगु समाज संरचनाया छगू मू आधार धयागु लजगा: ख: । अबु अजुया लजगा: ज्वन धा:सा गब्लें धां लाइमखु धका धया तइगु ख: । तर व समाज संरचना बुलुहुँ स्यना वन । स्यना वन जक मखु कि सत्ताया नीति न्ह्यावलें व संरचना स्यंकेत ग्वहालि जुइगु कथं हे जक जुयाबिल । नेवा: समाज संरचनायात मा:कथंया शिक्षा नीति जुइमफुत, लजगा:या ग्यारेन्ति व बिस्तार यायेगु सिवे नं थ: मालिक जुइगु लजगा: त्वःता कर्किया च्य: जुइगु, जागिर नयेगु लजगा: याइपिन्ति अप्व: तिब: विइगु लकस दयेका हल । थःगु हे लजगा: याये धाइपिन्ति हेवाय् चवाय् यायेगु ज्या भी नेवा:समाज नं याना च्वन । लजगाया आधारय् दयाच्वंगु समाज संरचनायात विकृत याना जातभातय् तक्थंका बिया नेवा:समाज थःगु तुतिइ थःम्ह हे पाल । सत्ताधारी वर्गपिन्सं नं नेवा:तयगु अजा:गु गल्लि पनेत गब्लें नं मस्व:, बरु मुल्लि ऐन दयेका: नेवा:तयगु लजगा संरचनायात जातभात संरचना हे ख: धयागु प्रमाणित यायेगु दस्तावेज दयेका बिया नेवा:समाज संरचनायात भज्यंक स्यंकेत ग्वहालि यात ।

(४) चरित्रया हिसाव स्वत धा:सा नेवा:त धयापिं सिर्जनशील, सक्रिय व इमान्दार ख: । छुं कि छुं ज्या यायेत माला जुइपिं, नेवा:त थ:म्हसिं गुलि ज्या याये फु, उलि जक याये फु धका धाइपिं नं ख: । मफुसा बरु मफु धायेगु, तर याये मफुगु ज्या याये फु धका माक:फुइ मयायेगु चरीत्र नेवा:तयगु आधारभूत चरित्र ख: । थ्व चरित्र सुनां दयेके धका दया वइगु मखु, सुनां हिले धका हिला वनीगु मखु । चरित्र धयागु संस्कार, सामाजिक मान्यता, विश्वास व अनुभवया लिच्व: कथं विकास जुइगु ख: । छुं नं ज्या यायेगु अनुभव मदुम्हसिं न्ह्यागु ज्या नं यायेफु धका तायेकिइ, छाया:सा वं गब्लें ज्या मयागु जुया ज्या यायेगु गुलि थाकु धका मस्यू । अथे जुया ला धाइ, धायेबलय् अ:पु (धर:ग्वारा त:पु । तर लिपा नेवा:समाज हिला वं लिसे नेवा: चरित्र नं हिला वनाच्वंगु दु । ख:सां मखुसां याये फु, याना बी, क्यना बी, धया बी, हया बी धका बकुत्यार खँ ल्हाना जुइपिं नेवा:त अप्वया: व:गु दु । थ:त फाइदा जुइगु जूसा कतिलापाक: पह: क्यनीपिं, छकूचा फाइदाया नितिं अन्याय सहयाना च्वनीपिं नेवा:त यक्व यक्व हे दया वल । थ:के

आत्मविश्वास दुपिं नेवा:त यक्व हे म्हो जक खने दु । संस्कार स्यनावंगु, सामाजिक मान्यता ध्वस्त जुया वंगु, धोखा बियेगु, व ज्याया अनुभव याये मखंगु हुनिं याना नेवा:चरित्र यक्व हे क्वथ्यना वनाच्वंगु दु ।

थथे च्वये धयाकथं ४गु आधारय् आक्रमण याना विइवं नेवा:समाज हिलावन । तर समाजय् ह्यूपा: चलायमान जुइ । निकास मालेगु लँपुइ नेवा:तसं नं गन गन फु अन अन थ:पिन्ति एडजस्ट याना यंकल । आख: ब्वना प्रशासन, व प्राविधिक (डाक्टर, इन्जिनियर, पाइलट, आदि) क्षेत्रय् यक्व दुहाँ वन । बिदेशय् नं थ:गु क्षमता क्यना त:त:धंगु जिम्मेवारी कुबिया च्वपिं नेवा:त यक्व हे दु । नेवा:त मथ्यंगु देय् मदु, नेवा:तसं ल्हा:मत:गु क्षेत्र मदु धया थें च्वं । थ:गु समाज संरचनाय् लिक्नुना च्वना म्वाये फैमखुत धका न्हू न्हू लँपु माला वपिं नेवा:त माला: वन धा:सा थुलिमछि थासय् नेवा:त थ्यनाच्वंगु दु कि इमिगु ल्या:चा: सुनां तयेफयाच्वंगु मदु ।

थथे नेवा:त हलिमय् न्यनां वनाच्वंगु स्वयेबलय् नेवा:समाजयात भ्रन बाँलात नि धायेगु मतिइ नं वने फु । तर अथे मखु । थथे समाज संरचना पाखे बिमुख जूया वपिं नेवा:पिनिगु आधारभुत सोच प्रणालिइ पञ्चायति शिक्षा पुसा पिनाव्यूगु महेन्द्रवादी चिन्तनं हाग: कया बिल । अले समाज बिखण्डित जुजुं नेवा:त चीधंगु दायरा दुने च्वनेयइपिं, थ:गु निजि स्वार्थ व निजि जिन्दगीयात जक प्राथमिकता विइपिं, व्यक्तिवादी, स्वार्थी मनूया पुच: कथं हिला वन । थ:पिं छाया् नेवा: ख:, नेवा: जुयाया कर्तव्य छु ख: धका वास्ता यायेगु सुइतं मयया वल । नेवा:समाजया बारे चिन्तन मनन यायेगु क्षमता मदयेका बिल । नांया ल्यूने च्वंगु बिनां (थर) स्वया जक थ:त नेवा: धाइपिं व भवय् नया नेवा:चहपह ल्यंका तया धका मतिइ तइपिं जुया वल । थ:त हे म्हमसिया वयेवं आ: नेवा:त बाँमलाक कमजोर जुइ धुंकल । क्षमता दया नं असक्षम पिनि जमात थें जुजुं वन ।

न्हापा न्हापा त्वाल्य् छगू फल्चा व देग: दयेके माल धा:सा म्हिचां जायेक जायेक धन प्व: प्वंके हइपिं नेवा:त दु धका बाखँ न्यना तयापिं भी नेवा:त, आ: भ्वखाचं भूबाया च्वंगु थ:गु छें भिंकेत नं 'ग्वहालि फवने' धका निवेदन तया जुइपिं नेवा:त स्वया च्वने माला: वल । थजा:गु विवशताया दथुइ हाकनं क्वाल्लि, बुँया खँय् सर्वय् नास जुइक थ:थ:हे दाजुकिजा तहकेहें पिं नाप मुद्दा म्हितइपिं नं भी नेवा:त जुयावल ।

पारीवारीक तुषं जक नेवा:तयत असक्षम याना त:गु मखु, राजनीतिक रुपं नं नेवा:त बिभाजित जुया वन । गुम्हं एमाले, गुम्हं काँग्रेस, गुम्हं माओवादी, गुम्हं राप्रपा धका थी थी पार्टीइ बिभाजित जूपिं नेवा:तसं अन्तिमय् छु छु यात ले धका स्व:सा: त:धं धा:पिं नेता जुइमा, चीधंगु तहया कार्यकर्ता जुइमा । इपिं दक्व वना हाकनं

व हे जातीय सत्ता सञ्चालन याना च्वपिनिगु च्य: जुया हे जीवन फुका च्वन । जिं मचाबलय् जिन्दावाद मुर्दावादया अर्थ मथूबलय् पार्टीया त:धंगु पोस्टय् च्वंम्ह भुमिगत नेता धका म्हस्युपिं नेवा:नेता थौं कन्हय तक नं छुं हे जिम्मेवारीइ मदु । पार्टीया आदेश कायेगु, उखें थुखें ब्याँय वनेगु –बस उलि हे जक । नेवा: समाज गर्ननिसें गन तक थ्यन, छुं हे विचा: मदु, गन थ्यंकेगु ले, छुं हे योजना मदु । धालधा:सा 'भीसं नेवा: जक मखु, नेपालया खँ ल्हायेमा:' धका धाइ । का म्वा:लका नेपालया हे खँ धयादिसँ रे धा:सा 'आ: पार्टी पाखे निर्णय वल कि धाये' धाइ – मतलव पार्टीया निर्णय? –व ला भीसं न्यनाच्वनागु ३५ दँ दयेधुंकल, मखुला? धा:सा 'छिमिसं र जनीति हे मथू' धका धाइ ।

धाये माले धुंकल –'थू छन्ति छिमि पार्टीया नेतातसें गय् याना घोडा गयाच्वन, दक्वं थू । ल्यायम्हचांम्ह हिरो यात भर्ना याना 'सक्रिय सदस्य'या तारण चिना च्य: दयेकु दयेकुं आ: सँ भुइसे च्वंम्ह बुद्धा जुइ धुंकल, अफ नं छं राजनीति मथू नि, तर जिमिसं थू ।'

पिनें पिनें न्ह्यागु राजनीतिक आवरण तया त:सां दुनें दुनें थन सत्ताय् वनेत जातीय समीकरण हे दकलय् शक्तिशाली बन्धन दु । व हे नीति कथं स्वनिगस्या नेवास्समाजयात कमजोर यायेत थन आप्रवासन अप्वयेका पिनें वइपिं मनू त तनेगु ज्या जुल । गुम्हं आख:ब्वनेत, गुम्हं लजगा: यायेत, गुम्हं वेपा: यायेत धाधां आप्रवासन अप्वया वन । गुलि गुलि आप्रवासन अप्वल, उलि उलि रफ्तारं नेवा:तयगु बुँ हस्तान्तरण जुजुं वन । ज्या याना नयेमा:पिं नेवा:त ज्या मयासें छें बालं बिया:नये पल्के थूया वल । ज्या मयाइपिं नेवा:पुच: खने दया वल । नेवा: समाज स्यंस्यं वन । नेवा: चरित्र भ्रष्ट जुजुं वन । अले आप्रवासनयात गति तच्चयेकेत 'जनयूद्ध'या नामय् पिने पिने आतंकया वातावरण दयेकाबिल । थथे जूबलय् स्वनिग:या बुँया भा: ह्वाराक्क थहाँ वन । धिबाया लोभय् नेवा:तयसं बुँ मिइगु नं तिब्र याना यंकल । छें दनेगु नं तिब्र जुल, तल्ला थछ्वयेगु नं तिब्र जुल । बुँ दलाल व रियाल्टर डिमान्डं स्वनिग:या अर्थतन्त्र हे क्वाराक्वारा संका बिल । म्हिग:तक 'खेतमा काम गरेर खाने नेवार' धायेका च्वनेमा:पिं छक्वलं 'करोडपति साहुजि' जू वन । लायतयेगु लकस मदु, तर म्हिचाय् धिवा धा:सा गाक्क दु । अथे जूबलय् धिवा मुंके फुपिनि धिवा नं रियाल्टर मार्केटय् हे दुहाँ वन । अले बुँया भा: कृतिम रुपं थहाँ थहाँ वन । व नापनापं सहकारी फैले जू वं बलय् धिवा चा:हिलीगु चक्र नं भ्रन तिब्र जू वन । थ्व दक्वया लिच्व: कथं मुद्दास्फिति तस्कं तच्चया वन । कथं

संघीय गठबन्धनया रिले अनशनय् बाबुराम भट्टराईया समर्थन



संविधान पुर्नलेखन याना पहिचानसहितया संघीयता, पहिचान व अधिकारया सुनिश्चिचता, पुर्ण समानुपातिक प्रतिनीधित्व, भाषिक समानता, फुक्क कथंया विभेद उत्पिडनया अन्त्य, कालावजारी, भ्रष्टचारीयात कारवाही, भुक्क पीडितयात तत्काल राहतया व्यवस्था लगायतया माग याना शान्तिपुर्ण आन्दोलन याना वयाच्वंगु संघीय गठबन्धन वंगु जेठ २६ गतेनिसं यँया चकंदबुलिइ रिले अनशन यानाच्वंगु दु ।

रिले अनशन न्ह्याकूगु स्वन्हु दुखुहु पुलांमह प्रधानमन्त्री नापं प्रस्तावित नयाँ शक्ति पार्टीया नेता बाबुराम भट्टराई नं जेठ २८ गते अनशनस्थल चकं दबू वना: समर्थन यानादीगु खः ।

वय्कलं धयादिल, “संघीय गठबन्धनं ल्हवंगु मुद्दा नेपाली जनताया मंका: मुद्दा खः । छायाधा:सा, नेपालय् गुगु इलय् भौगोलिक एकीकरण जुल, व न्हापांगु व आधुनिक नेपा:या कालखण्ड खः । उकिं पुलांगु सामान्ती, निरंकुश, एकात्मक, राजतन्त्रात्मक राज्यया एकीकर

ण यात । उगु ईया सामन्ती युगय् सायद भीके मेगु विकल्प मदु जुइ । तर वंगु ८० दैनिसं नेपाली लोकतान्त्रिकरणया प्रक्रिया न्ह्यात ।”

नेपाली जनताया त:हाक:गु सघर्षलिपा नेपालय् संघीइ लोकतान्त्रिक गणतन्त्रया संविधान जारी जुया: गुगु मागत सम्बोधन जुइमफुत, गुलि खँत ल्यन ।

गुगु प्रावधानत अपूर्ण जुल, उकियात पूर्णता विइगु नितिं संघीय गठबन्धनं गुगु ढंगं थ:गु आन्दोलन जारी या:गु दु, वप्रति नयाँ शक्ति नेपालया पाखें जिगु पूर्ण समर्थन दु ।

गठबन्धनं क:घा:गु सत्याग्रहया आन्दोलनप्रति जि पूर्ण रुपं ऐक्यबद्धता प्वंकाच्वना । वय्क:पिं प्रति जिगु पूर्ण समर्थन दु ।”

अथे हे प्रतिगामी संविधानया विरुद्ध आन्दोलनर त तमुवान संयुक्त संघर्ष समिति संघीय गठबन्धनं काठमाडौंया खुल्ला मञ्चय् जुयाच्वंगु रिले अनशनय् ऐक्यबद्धता क्यना पोखराया चिप्लेढुंगा मानवअधिकार चोकय् छावा:या नितिं अनसन च्वनाच्वंगु दु ।

रिले अनसनया न्यान्ह्या दिं म्हिग: सनिवा: पोखराय् नं १५म्ह मिसात रिले अनसन च्वंगु दु । तमुवान प्रदेशया घोषणा या धका: तमु सहयोग समिति पार्दीया अध्यक्ष छलिमाया तमुया अगुवाइलय् चार भञ्ज्याड तमु समाजया मीनाकुमारी तमु, देवी तमु, हिमाली गुरुड परिवारया अध्यक्ष शान्ति घले, धनमाया तमु, हरिमाया तमु, हेमकुमारी तमु, देउकुमारी तमु, तामाड बौद्ध सेवा समितिया सचिव विष्णु तामाड, अञ्जु तामाड, तनहु समाजया यमकुमारी तमु, भुजेल समाजया सुष्मा भुजेल, नेपाल मगर संघया लिला माया थापा, पवित्रा थापा व दलित(शिल्पी) समुदायया पाखें तारा नेपाली रिले अनसन च्वंगु दु ।

अथे हे चकं दबूली जुयाच्वंगु रिले अनशनया समर्थन याना: नागरिक समाज, मानव अधिकारवादी, पुलापिं र जनीतिज्ञपिं नाप यक्वसं समर्थन याना अनशनकारीपिन्त हौसला बियाच्वंगु दु ।

उगु अनशन जेठ २६ गतेनिसं असार मसान्ततक चलय जुइगु जूगु दु ।



कीर्तिपुर स्वयंसेवक समाजया शैक्षिक प्रदर्शनी सम्पन्न

ज्वजलपा वा:पौ /

एस.एल.सी. परीक्षा विद्युंका: परीक्षाफल प्रकाशित जुइ न्ह्य: दँय्दसं शैक्षिक प्रदर्शनी याना वयाच्वंगु कीर्तिपुर भोलियन्टसं सोसाइटी म्हिग: सनिवा: शैक्षिक प्रदर्शनी यात ।

सुथय् १० ता: इलनिसं सनिलया ४ ता: ईतक जूगु उगु प्रदर्शनी १८ गू कलेजतसं ब्वति का:गु खः । Banner Sponser- Kathmandu Burnhardt College, प्रमुख प्रायोजक Nepalaya HSS/ College सहप्रायोजक Gyankunj College, Cambridge HSS/College खः ।

अथेहे शैक्षिक प्रदर्शनी ब्वतिका:पिं किपूया जनसेवा उच्च मा.वि, मंगल उच्च मा.वि, सहिद स्मारक कलेज, लेबोरेटरी उच्च मा.वि., काठमाडौं क्याम्पस, क्यापिटल हिल कलेज, जुबिल्यान्ट कलेज, डिएभी कलेज, काठमाडौं मोडेल कलेज, अरनिको इन्टरनेशनल कलेज, पाटन निस्ट कलेज, रिपब्लिका कलेज, एशियन कलेज र राईजिंग स्टार कलेज रहेका छन ।

सबै कलेजहरुले आफ्नो कलेजको बारेमा प्रकाशित बुकलेट व थीथी उपहार बिया: प्रदर्शनी स्व:व:पिनिगु ध्यान सालेगु यानाच्वंगु खने दु ।

अभिभावक सहित व:पिं विद्यार्थीपिन्त आ: थथें भर्ना जुइगु फाराम भरय् या:सा भर्ना फी निशुल्क यानात:गु खः । गुलिसं न्ह्यस: लिस: कासा याना नं भर्ना फि निशुल्क यायेगु यानाच्वंगु दु । आयोजकया पाखें विद्यार्थीतसं एसएलसी प्रवेश परीक्षाया प्रवेश पत्र क्यन धा:सा अभिभावकयात नापं छगू छगू प्लेट मम: नकेगु याना: कुपन इना: बियाच्वन ।

प्रवेश निशुल्क ख:सा प्रवेश टिकट बिया: व टिकटयात गोला प्रथा कथं थीथी सिरपा:या नं व्यवस्था यानात:गु दु ।

QFX/Big Cinemas या निशुल्क फिल्म टिकट, T-Shirts १० पा:, Futsalया १० पा: टिकट सितिकं बिउगु दु ।

साहित्यकार नापं स्टम्भकार साय्मियात ज्वना स्वघौ लिपा रिहा

साहित्यकार नापं स्टम्भकार स्नेह साय्मियात प्रहरी गिरफ्तार याना स्वघौ लिपा रिहा या:गु दु । शनिवा: न्हिनय् १ बजे यँया हुंगेअड्डालय् डोजर छें टहरा थुना च्वंगु इलय् स्थानीयवासी साय्मिं डिएसपीयात न्यनेकने यानादीगु खः ।

अथे न्यनेकने यानादीगु इलय् वय्कलं थ:गु मोबाइल किपा: नं कयादीगु खः । अथे किपा: काल धका: तत्काल हे साय्मियात गिरफ्तार याना कालिमाटीया प्रहरी ज्याकुथिइ यंका: कुना बिउगु खः । अथे साय्मियात गिरफ्तार या:गु घटनायात कया प्यखेरं विरोध याना हयेवं स्वघौ लिपा रिहा या:गु खः ।

प्रहरी ज्याकुथिइ साय्मियात सतक विस्तारय् पंग: थनागु ख: धका: भ्वं यायेत दबाव बिउगु

ख:सा वय्कलं उकियात अस्वीकार यानादीगु खः । अनं लिपा किपा: का:गुलिं ज्वनागु अले वय्कलं किपा: कयागु ख: धका: भ्वं याका साय्मियात त्व:ता ह:गु ख: धका: च्वमि साय्मिं ज्वजलपा वा:पौयात जानकारी बियादीगु दु । वंगु छुं दिं न्ह्य: जक उपत्यका सतक विस्तार संघर्ष समिति सतक



विस्तारया नामय् थ:पिनिगु मानव अधिकार तकं हनन यात धका: उजुरी विइगु ज्या या:गु दु । जुलुस हे वना अथे उजुरी पौ बिउगु खः ।



किपुली नगरस्तरीय बालक्लब नीस्वन



किपू नगरपालिका दुनेया १९ गुगू वडाय बाल सञ्जाल गठन यायेधुंका: वंगु जेठ २२ गते बाल भेलाया आयोजना यात । उगु भेलां लसता शाक्यया अध्यक्षताय किपू नगरस्तरीय बाल क्लब नीस्वंगु दु । उपाध्यक्षय अर्पणा श्रेष्ठ, सचिवय अनिता रुम्बा, सहसचिवय देवी श्रेष्ठ, कोषाध्यक्षय दिक्षा बस्नेत व दुजलय इनाप महर्जन, रुबी शाह, विजल बज्राचार्य, विनी महर्जन, प्रणय मालाकार, रुविण ढकाल, सुशान बस्नेत, साहिल महर्जन, मिकेस श्रेष्ठ, सृष्मा खत्री, इसा कार्की, बुनु महर्जन, साजन महर्जन व निमेष खनालयात ल्यःगु दु ।

नगर बाल अधिकार संरक्षण व सम्बर्द्धन उपसमितिया ग्वसालय जूगु उगु ज्याभवःया सभानायो बाल प्रतिनिधि सुदिक्षा श्रेष्ठ खःसा मूपाहाँ किपू नगरपालिकाया बरिष्ठ लेखा अधिकृत सानुबाबु परियारं त्वारबालय मत च्याका: ज्याभवःया उलेज्या यानादीगु खः । उपसमितिया दुजः नापं मानव अधिकार संगठन किपू कचाया अध्यक्ष शोभा महर्जनं लसकुस न्वचू बियादीगु खः ।

किपू नगरपालिकाया अनुज प्रधानं भिन्तुना न्वचूया भवलय “थःगु इच्छा पूर्वकेगु नितिं हार्ड वर्क, टिम वर्क व नेट वर्कया आवश्यक जुइगु” धयादिल ।

अथेहे, सीविनया स्वस्तिका प्रधानं थःगु संस्थापाखें बाल अधिकारया सवालय सुरुनिसें हे पहल याना: वयाच्वंगु दु धासें किपू नगर पालिकाया समन्वयपाखें बालमैत्री ग्वाहालिया नितिं सरोकार निकायया हैसियतं ग्वाहालि जुयाच्वंगु खं कनादिल ।

मूपाहाँ परियारं मचातयगु चौतर्फि विकासया नितिं बाल बचाउ, बाल संरक्षण, बाल विकास व बाल सहभागिता मदयेकं मगाःगु विषयत खः धका: धयादिल । वयकलं उकिया नितिं कार्यान्वयन पक्षया आवश्यकता जुइ धासें स्थानीय बालमैत्री शासनया नितिं नगर पालिकां नेपाःया कानून व संविधानसम्मत रणनीति हयेगु व लागू यायेगु धयादिल ।


ज्याभवलय सहभागी मचापिन्त थीथी कथंया कासाय ब्वति कायेकूगु खः ।

किपू नगरपालिकाया ज्ञानबज्र महर्जनं न्ह्याकूगु उगु ज्याभवलय बाल प्रतिनिधि सभापतित्व यानादीमह सुदिक्षा श्रेष्ठं नुगःखं तयेगु भवलय नगरस्तरीय बाल क्लबपाखें आः फुक्क क्लबतयगु नेटवर्क ज्याय सहज रुपं ग्वाहालि काये खनीगु विश्वास प्वकादिल ।

कीर्तिपुर सामुदायिक स्वास्थ्य केन्द्रया परामर्श ज्याभवः

कीर्तिपुर सामुदायिक स्वास्थ्य केन्द्र किपुली ज्येष्ठ नागरिकपिन्त स्वास्थ्य विज्ञान व मनोसामाजिक परामर्श बिइगु ज्याभवःया भिन्ना: सनिवा:नगरमण्डप श्रीकीर्तिविहारय उलेज्या जुल । मूपाहाँ पुलांम्ह राज्यमन्त्री व केन्द्रया संस्थापक सल्लाहकार दिलिप महर्जनं त्वार बालय मत च्याका: उलेज्या यानादीगु खः ।

नविन महर्जनं न्ह्याकूगु उगु ज्याभवःया सभापतित्व हिरा बहादुर महर्जनं यानादीगु खः । लसकुस न्वचू नापं उगु ज्याभवःया बारे संयोजक सुर्जलक्ष्मी महर्जनं बियादीगु खः । जिल्ला विकास समिति काठमाडौंया ग्वाहालि किपू लागाया ज्येष्ठ नागरिकपिन्त लक्षित उगु ज्याभवः छ्वाःया निति जुइ । उगु परामर्श ज्याभवःया प्रशिक्षकपिं रुपेन्द्र महर्जनं, सुर्जलक्ष्मी महर्जनं, अन्जु महर्जनं व नानी महर्जनं खः ।



साहित्य/चिनाखं

त्वा:देवा: क्वय् च्वनां मतं मखःपिं



कवि राम महर्जन,
नगां, किपू-१६

किपुली लःया हाहाकार जुल

खानेपानी अफिसय पटक पटक धा: वन

जिमित त्वनेगु लः माल धका:

खानेपानी छवया:हल फोहर लः

त्वनेलात वहे लः स्वलातक

जब उसायें मदु जुल दाजु किजापिं

अलेतिन न्ह्यलं चाल बल्ल

जुरु जारुं दनावल बुद्धिजीवी वर्गत ॥

समस्या समाधानया लागि समिति दयकल

थाय् थासय् ब्याय् जुल समितिया दुजःपिं

लःया समस्या समाधान याये धका:

तर सुनानं समाधान याय् मफुत ॥

विभिन्न समूह नं छलफल न्ह्याकल

कोशिस यात ब्याय् जुल

अयुनं पूर्वक समाधान याये मफुनि

छाय थथे जुल कारण थुईकुसा बांलाईथें च्वं ॥

खानेपानी अफिस व नगरपालिका कार्यालयया

स्थानीय खासखुस सल्लाहकारत सु सु खः

न थ्व समास्या इमिगु मुट्ठी दुने

तःक्यना च्वंगु खः ला ?

किपूमितयगु समस्याय् दुने

स्थानिय मनूत हे वकः जुयाच्वंगु खः ला ?

थ्व खँ थुइके माल दकलें न्हापां

लःया मुहान सुकेजुल त्वनीपिं मनूत बढेजुल ॥

कारण थ्वजक पक्का हे मखु

सम्बन्धित निकायतयगु नं लापरवाही खःला ?

दुरयंक वाला स्वयम्माःगु दु

नत्र त्वा: देवा क्वय् च्वनां मतं मखय्का

च्वने माःगु छाय ?

छिं नं चिनाखं च्वयादिसं ज्वजलपा वा:पतिइ
पिकायेगु नितिं छवया हयादिसं

तपाईंको टोलमा भएका घटना कीर्तिपुरको समाचार बनाउने
हो भने तपाईं एक कल फोन गर्नुस् हामी तपाईंको टोलको
समाचार कीर्तिपुरको समाचार बनाईदिनेछौं

कीर्तिपुरको
चित्रण



किपुलिं पिदनाच्वंगु कीर्तिपुर सन्देश वा:पौ व ज्वजलपा: वा:पौया ग्राहक जुइगु नितिं स्वापू तयादिसं

कार्यालय: निखासी टोल: कीर्तिपुर नपा-३
फोन नं.: ४३३३००७, ९८४१४०१०७७

ज्वजलपा वा:पतिइ छिगू चिनाखं/बाखं/हाइकू विज्ञापन
व मेमेगु च्वसू पिथनेगु जूसा जिमित स्वापू तयादिसं

सकलसिगु मंका: सः



ज्वजलपा वा:पतिइ

ज्याकू: निखासी त्वा: किपू नपा-३ फोन ल्या: ४३३३००७,
९८०८६२६४२० ई-मेल : kirtipur_sandesh@live.com



थुगु वाःपौया बंगु वालय् पिदंगु थुगु स्टम्भय् 'नमुना नेवाः वस्ती थसि'या च्वसुइ 'न्यासः खाया छँ'
अले जात्रा 'चैत्र मसान्तं'निसें जइमाःग थासय मेता हे जयाच्वंगलिं भिंकाच्वना । च्वमि

चिनाखँ

ग्वाहालि ग्वाहालि

**नाति महर्जन
छोचपा, पाँगा**

देशया अवस्था खँ खँ नुगः मछिना
सहयाय मफया जनतां दुःख स्यूगु खनाः
थ्व लुटतन्त्र परिवर्तन यायेत
दनाः वयेत्यना जिपिं ध्वाँय् ज्वनाः ॥
देय् न्यंक भ्रष्टाचार व कालोबजारी यानाः
दुष्टतयसं देय्या धुकु लुटे यानाच्चंगु खनाः
थुमिगु अत्याचार सहयाय मफया
थुमित देसं पितिना छवयेत
जनता सकसिकें ग्वाहालि फवं वयाच्चना ॥
गरिबया दुःख तंका छवयेत
थ्व लुटतन्त्र न्हंकाः छवयेत
देशय जनताया राज हयाः
जनता सुख चैन च्वनेत
हानं छकः आन्दोलन यायेमालधाः वयाच्चना ॥
देशं दानव राज न्हंकाः छवयेत
भ्रष्टाचारीतयत् भुन्दे यायेत
कालोबजारीतयत् न्यवः घाकेत
खिपः, न्यवः ज्वना
मजदुर किसान बुद्धिजीवी सकलें
हा दनेथें छकः दनाः वा धाः वयाच्चना ॥
तये हे मजिल आःला सत्ताय इमित
पालंपाः लुटे याना नये पल्के थुइधुकुपिन्त
देश व जनता नागां यानाः
थःजक भोरी खाकुपिन्त
भंडाफोर यानातिनि खेलय् तयाः
नःगु धेवा ल्होकेत
हानं छकः जनतायात थें वयाच्चना ॥
अभावया सागरय् जनता क्वफाना तल
फयां फय् मफय्क
विदेशी ऋण कुबिइका तल
नय् मखेपिं वयाः देशया धुकु लुटय् याना
जनता दुःख कष्टया चिताय् थ्यनातल

जनता थ्यनाः तःगु चित्ताय् इमित थ्यनेमाल॥
देशया बजेतं फय्मफय्क सांसदतयत्
तलव भत्ता नकल
समानुपातिक, मनोनित यानाः
कलाःपिं हे सांसद दय् कल
खुसः खुसः सभासदतयत्
न्हिच्छ न्हिच्छ कय्ताय् सि स्वकाः
किसि लहिथें लहिनाः तल
थ्व ज्या मदुपिं किसि ख्याना छवयेत
मिप्याः ज्वनाः सकलें पिहां वा धाः वयाच्चना ॥
बुद्धिजीवी, समाजसेवी, सःस्यूपिन्त ख्यानातल
अख्तियार धकाः च्वयाः बुँख्याःचा छम्ह क्यनातल
सरकारया विरोध यातकि व बुँख्याःचां दुःखवी धकाः
पुलापिं हाकिम समाजसेवीत सातु वंका जुल
व बुँख्याःचा छुं मस्यूपिं सोभा सिधा जक ख्याइम्ह
सकसितं नं थौं कँ वयाच्चना ॥
युवा विद्यार्थी संघ सकलें मिलेजुई माल
पाटीया भातु संघतयसं नं सिइके माल
नेतातसें भीत थुलिमछि दत दास यानातःगु
आ इमि कठपुतली जुया च्वने मजिल
इमान्दार त्यागी नेता ल्ययगुया लागि
हानं छकः आन्दोलन याये माल धाः वयाच्चना ॥
याकन छवयेमाल थुमित सत्तां पितना
भी जनता सकलें मुना
थ्व जंगल राज न्हंका जनताया राज हयेत
थुमिसँ देय् लुटय् यानातःगु धेवा ल्हवकेत
ग्वाहालि ग्वाहालि धकाः हाः वयाच्चना
सकसिकें ग्वाहालि फों वयाच्चना ॥
थुमि हे ल्हातय् निदँ प्यदँ देय् लानाच्चन धाःसा
जि मांया काय्सा थुमिसं देय् मिया मनःसा
थुमित देय् व जनता माःगु हे मखु
मां बौ हे म्वाःपिं थुपिं धेवा जक दःसा
थुमिगु ल्हातय् सत्ता बिया तया मजिल
थःगु मातृभूमिया माया दःसा
गामय् सहरय् वना ग्वाहालि फवं वनेमाल
सकल नेपामी याकनं थें वनेमाल ॥

बिचाः हायेका

जन्म :
वि.सं. २००३/
०२/०६



मदुगु :
वि.सं. २०७३/
२/२७



स्व. गोपि महर्जन

ज्यापु महागुथि किपू नगरसमितिया
जीवंकाःछि जः पाँगा महाबो त्वाःया दिपक
राज महर्जनया अबु गोपि महर्जन ७०
दँया बैशय् वंगु २०७३ जेठ २७ गते
मदुगुलिं मदुम्हेसिया सुखावति भुवनय् बास
लायेमा धकाः निर्वाणया कामना यासैं
दुःखंकःपिं सकल छँजःपिन्सं मनचिइ फयेमा
धकाः बिचाः हायेका च्वना ।

ज्यापु महागुथि

किपू नगर समिति

छिं स्यूला थें असार १४ गते धुंकाः १२ दँ लिपा जक स्वये खनी ?



सफू दइगु थाय् १) ख्वपया च्याम्हसिंहया स्टेशनरी पसः (श्याम सुन्दरया पसः), २) ख्वप कमल विनायकया
स्टेशनरी पसः, ३) किपूया सतःक्वया स्टेशनरी पसः, ४) किपूया देय् पुगूया बाघभैरव स्टेशनरी पसः, ५) किपूया पांगा
दोवाटोया किपू बूक प्वाइट, ६) यँया भोताहिनि नातिबज्रया पसः,
७) यँया कुलाभुलिइ च्वंगु मंकाः धुकू पसः,
८) यल, यल ध्वाखा अर्जुन स्टेशनरी पसः,
९) स्वापू नितिं मेमेगु फोन नम्बरः ४३३४०९३, ९८४९७५२५८३, ९८४६०४६९२३९

मू
सच्छि तका जक (१००/-)

**किपूया गथु प्याखं
(गं मखाःगु प्याखं)**

सफू बजारय् पिदने धुकूगु दु
थःगु प्रति सुरक्षित यानादिसँ

सफुतिइ दुने

- १) गथु समुदायया इतिहासनिसें वर्तमान तक
- २) गथु प्याखनय् दुध्यानाच्चंगु तान्त्रिक व बैदिक दर्शन
- ३) नासः बःयात किसिलिं छाय् तइगु खः ?
- ४) किपूया गथु प्याखनय् दुध्यानाच्चंगु थीथी पक्ष
- ५) गथु प्याखंया थीथी नां
- ६) किपूया ख्वाःपाः प्याखं मध्ये गथु प्याखं नापं मेमेगु